

**RESOLUCIÓN DA UNIVERSIDADE DE VIGO POLA QUE SE FI-
XA O PROCEDEMENTO E O PRAZO DE PRESENTACIÓN DE
SOLICITUDES DE AVALIACIÓN DA ACTIVIDADE INVESTIGA-
DORA PARA O PROFESORADO CONTRATADO DOUTOR,
PROFESORADO PERMANENTE LABORAL E PROFESORADO
AXUDANTE DOUTOR CORRESPONDENTE AO ANO 2023.**

Co obxecto de dar cumprimento ao establecido no artigo 31 do II Conve-
nio Colectivo do Persoal Docente e Investigador laboral das Universidades da
Coruña, Santiago de Compostela e Vigo, e ao Acordo do 26 de novembro de
2021, acadado na Mesa de Negociación do PDI, polo que se posibilita ao profe-
sorado contratado doutor, ao profesorado permanente laboral e ao profesorado
axudante doutor solicitar o recoñecemento do complemento de produtividade
investigadora, é necesario iniciar o procedemento para a presentación de solici-
tudes de avaliación da actividade investigadora correspondente ao ano 2023, po-
lo que

ESTA REITORÍA RESOLVE:

Primeiro. O profesorado contratado doutor, o profesorado permanente
laboral e o profesorado axudante doutor poderá presentar a súa solicitude de
avaliación da actividade investigadora correspondente ao ano 2023 dende o 22
de xaneiro ata o 12 de febreiro de 2024, na sede electrónica de ANECA:
<https://aneca.sede.gob.es/>.

Segundo. A presente convocatoria rexerase polas normas específicas con-
tidas nesta resolución e nas súas correspondentes bases recollidas no Anexo I.
Nos aspectos das bases que concirnan á valoración dos currículos aterase ao dis-
posto en:

a) A Lei 39/2015, de 1 de outubro do Procedemento Administrativo Co-
mún das administracións públicas (BOE do 2).

b) O Real Decreto 1086/1989, de 28 de agosto, sobre retribucións do pro-
fesorado universitario (BOE de 9 de setembro).

c) A Orde de 2 de decembro de 1994, pola que se establece o procede-
mento para a avaliación da actividade investigadora do persoal funcionario dos
corpos docentes universitarios (BOE do 3), modificada pola Orde de 16 de no-
vembro de 2000 (BOE do 21).



d) A Resolución de 5 de decembro de 2023, da Comisión Nacional Avaliadora da Actividade Investigadora, sobre os criterios específicos para cada un dos campos de avaliación (BOE do 16 de decembro de 2023).

e) O convenio de colaboración entre a Universidade de Vigo e o Organismo Autónomo Axencia Nacional de Avaliación da Calidade e Acreditación (ANECA) relativo a encomenda de xestión para a avaliación da actividade investigadora do profesorado contratado.

f) E demais normas vixentes que sexan de aplicación.

Terceiro. No non previsto polas bases desta convocatoria para a valoración dos currículos rexerán as mesmas normas que sexan aplicables ao persoal docente funcionario.

Cuarto. Resolta a convocatoria, a Universidade ditará resolución na que se fixarán os tramos correspondentes e os efectos económicos que puideran corresponder a cada persoa solicitante.

Quinto. O profesorado contratado doutor, o profesorado permanente laboral e o profesorado axudante doutor poderá presentar a solicitude de validación das avaliacións positivas daqueles tramos de actividade investigadora recoñecidos con anterioridade por outras universidades, cando devandito recoñecemento se tivese producido tras un procedemento de avaliación no que tivese intervido a propia CNEAI, cos mesmos requisitos e criterios que o persoal funcionario ou persoal contratado avaliado por convenios asinados coas universidades públicas.

Neste caso, a solicitude presentarana de acordo co indicado no punto 9 do anexo.

Sexto. As persoas participantes están obrigadas a facilitar aqueles datos e información que a Administración precise para a tramitación e instrución deste procedemento e, en caso de non o facelo, excluírase do proceso selectivo.

De conformidade co artigo 13 do Regulamento UE 2016/679 do Parlamento Europeo e do Consello, do 27 de abril, relativo á protección de persoas físicas con respecto ao tratamento de datos persoais e á libre circulación destes datos, e co disposto no artigo 11 da Lei orgánica 3/2018, do 5 de decembro, de protección de datos e de garantía dos dereitos dixitais, os datos persoais que figuren neses documentos serán tratados baixo a responsabilidade da Universidade de Vigo, co propósito de xestionar a tramitación deste concurso, ao abeiro da LPACAP, da LOSU e dos Estatutos da Universidade de Vigo.

De conformidade co disposto no artigo 45 da LPACAP, a Universidade de Vigo está lexitimada para a publicación daqueles datos persoais que fosen precisos atendendo á natureza e finalidade do acto que sexa obxecto de publicación. Non



obstante, e co fin de previr riscos da publicidade de datos persoais de vítimas de violencia de xénero, a persoa afectada comunicarlle esta circunstancia coa maior celeridade á Unidade de Igualdade da Universidade de Vigo (986 813419 e igualdade@uvigo.es).

As persoas participantes teñen dereito a solicitar ao responsable do tratamento, en calquera momento, o acceso, rectificación ou supresión dos seus datos persoais e a limitación do seu tratamento, así como a opoñerse a este tratamento e a solicitar, salvo casos de interese público e/ou exercicio de poderes públicos, a portabilidade dos seus datos. Estes dereitos poderanse exercer a través de calquera dos medios e vías previstos na súa política de protección de datos (dispoñible en <https://www.uvigo.gal/proteccion-datos>), incluído o envío ao/á delegado/a de protección de datos a través do correo electrónico dpd@uvigo.gal.

Así mesmo, se a súa solicitude non é atendida pola Universidade de Vigo, teñen dereito a presentar unha reclamación ante a Agencia Española de Protección de Datos.

Sétimo. Contra esta convocatoria, que esgota a vía administrativa, poderase interpoñer recurso perante a xurisdición contencioso-administrativa, no prazo de dous meses contados dende o día seguinte de recibir esta notificación, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

As persoas interesadas poderán optar por interpoñer contra esta resolución recurso de reposición, no prazo dun mes contado a partir do día seguinte de recibir esta notificación, perante o Reitor. Neste caso non se poderá interpoñer un recurso contencioso-administrativo ata que sexa resolto expresamente ou se produciase a desestimación presunta do recurso de reposición interposto, segundo o previsto no artigo 123.2 da Lei 39/2015, do 1 de outubro, do procedemento administrativo común das administracións públicas.

O reitor,
Manuel Joaquín Reigosa Roger

